

Augsburg, 21. Juni 1563

An Johannes Oporinus

UB Basel, Fr. Gr. I 11, fol. 262r.

Steinmann Nr. 754.

Lit.: Steinmann S. 107.

S. P. D. Etsi mihi abs te potius, quam tibi à me responsum expectandum est (Scripsi enim si non pro expectatione tua et voto meo, at fideliter et diligenter) nolui tamen hunc tabellarium sine meis literis dimittere, vt si priores vel casu aliquo perierint, vel diutius quam par est (id quod omnino suspicor esse factum, incuria eorum qui se curaturos receperant) detentae fuerint: sententiam meam non ignores.

Ac primum, quod tibi in primis curae est, Ναὶ μὰ Δία καὶ πάντας τοὺς Θεοὺς, ἄνθρακες ἡμῖν ὁ θησαυρὸς. Quod si Mi D. Oporine, tibi res istorum aequae notae essent atque pluribus quam vellem notae sunt: furoris ipse me argueres, si ab ijs peterem, vt periclitanti subuenirent, qui ipsi ad sacram ancoram configuiunt. Neque libet neque decet apertè haec scribere. Patere quaeso tibi satisfactum ab eo, qui non plus per se potest, quam quantum ab alijs impetrare potest. Qui cum florentioribus rebus suis non magni me fecerint: quo tu loco atque numero me nunc esse putas?

Specimen Officiorum accepi, quod per placet, rogaui vt pergeres, et per occasionem chartas quot posses, emendandi ergò mitteres.

Bibliothecae tuae indicem et aestimationem si accepero, vt pecuniam, quanti illa est, accipias, curabo, idquē, quantum in me fuerit, quam primum. Hoc enim mihi credas velim, non tu cupidior es τοῦ ὀφελεῖσθαι δι' ἔμοῦ, ἢ ἐγὼ τοῦ ὀφελεῖν σὲ.

In conuersione τῶν ιστορικῶν καὶ πραγματικῶν τόπων τοῦ Σουιδα, ferè quadrantem absolui, καν μὴ παράλογόν τι περὶ ἡμᾶς γένοιτο, non per me stabit, quo minus vernis nondinis anni 1564 abs te edatur. Magnificus et generosus Baro D. Carolus Villingerus, cuius rogatu hoc onus in me suscepi, graeca cum Latinis coniungi vellet. Verum id bifariam ἄπορόν μοι δοκεῖ. Nam et graecae linguae ignari, graeca respuent, et eiusdem studiosi Graecum Suidam integrum expetent. Est et illud considerandum, an Frobenij exempla sua distraxerint. Quod si esset, vti fortassis est, quid si tu sumptibus illorum Suidam graecè, eundemquē Latinè seorsim, sic vti vel coniungi vel separari possent, imprimeres? Quod si graecus edendus esset: non recusarem multa superuacanea recidere, deprauata corrigere, transposita in suum reponere locum. Sed quia Graeca editio minus me solicitat: a D. Villingero impetrari posse existimo, vt sola editione Latina sit contentus, sic tamen, vt in folio, cliuisis columnis, charactere eleganti excudatur. Opus, paulo minus opinor futurum, quam meos in officia commentarios, et tale quidem opus, quod tibi si non secundis, at tertiijs nondinis sit recudendum. Videbis id mirabiliter abripi, tanta est per complures iam annos in expectatione, ac profectò multiplex inest et varia, et ipsa varietate et multitudine iucundissima eruditio, quam ego nunc demum perspicio, dum opus ordine euoluere cogor. 80 f. idem D. Villingerus, vti spero, vnà cum meis literis iam ad te misit. Sin secus accidit, equidem mirabor, tuisquē commodis summa fide inseruiam.

Petij etiam abs te, vt primam Isocratis te Demosthenis mei Latini editionem, itemquē Venetam Demosthenis, et Lutetianam Isocratis, si posses, conduplicatas singulas, mihi mitteres, idquē ad proximas nondinas per Hillerum. Fac quaeso, si poteris. Vale ac D. Carino P[urimam] S[alutem] tam a D. Huldricho Fuggero quam a me. 21. Iunij. 1563. Augustae, vbi a lue pestili non immunes sumus.

Hiero[nymus] Wolfius  
Tuus.

Chartas in Officijs excusas, mitte, et perge strenuè et arbitratu tuo. Neque in ipso opere, neque in praefationibus quicquam mutatum volo. Hoc ipso die commentarios in de Senectute absolui. sed nondum relegi. Triduo tamen id, si iusseris, fieri poterit. Paginas implebunt opinor circiter?